

Inatsisartut peqquutissaattut siunnersuummut nassuiaatit.

## **Nalinginnaasumik nassuiaatit**

### **1. Aallaqqaasiut:**

A/S Inissiaatileqatigiiffik INI-mit aamma Inatsisartut Ombudsmandiannit saaffiginnissutit tunngavigalugit allannguutissatut siunnersuut Naalakkersuisut saqqummiuppaat. Tamanna tunngavigalugu inatsisitigut tunngavigineqartunik erseqqissaanissaq, tamatumalu peqatigisaanik ineqarnermut akiliutit allangortinneqarneranni ineqarnermut tapiissutit iluarsiivigineqarnissaannut attartortut qulakkeerivigineqarnissaat Naalakkersuisut kissatigaat.

### **2. Siunnersuummut pingaarnertut tunngavigineqartut:**

Pequssuummut allannguutissatut siunnersuut ineqarnermut akiliut allangorneqassappat ukiup naatsorsuuteqarfiusup ingerlanerani ineqarnermut tapiissutit iluarsiivigineqarnissaannik periarfissiivoq. Tamatuma attartortut inatsisitigut inissisimanerat pitsanngoriartippaa, ineqarnermut akiliut qaffassimappat peqatigisaanik ineqarnermut tapiissutinut aaqqiissuteqarnissaq qulakkeerivigineqassammat.

Ineqarnermut tapiissutisisaannarnissamut inatsisitigut tunngavigisat erseqqinnginerat pillugu Inatsisartut Ombudsmandiat Naalakkersuisunut oqaaseqaateqarsimavoq. Ombudsmandip maanna periaaseq uparuarppaa, tamatumani ineqarnermut tapiissutit ukiumoortumik iluarsiivigineqartarnerata annertussusianut atatillugu ineqarnermut tapiissutisisartut inoqutigiit amerlassusii, katitigaaneri isertitanullu tunngasut pillugit paasissutissartalimmik nutaamik qinnuteqaammik nassitsisarmata. Nutaamik qinnuteqaanginneq pineqartup ineqarnermut tapiissutinik pinngitsoorneranik (annaasaqarneranik) maannakkut kinguneqartarpoq.

Inatsisartut Ombudsmandiata uparuarppaa, maanna periaaseq inatsisartut peqqussutaanni § 9, imm. 2-mut naapertuutinngitsoq, taanna ineqarnermut tapiissutinik iluarsisarnermut taamaallaat atuummat. Taamaalilluni suliatigut paasissutissiisarnermut malittarisassanik tunngaveqarluni aalajangerneqarsinnaanngilaq innuttaasoq tapiissutinik inatsisit malillugit pisinnaasaanik mattunneqassasoq.

Ombudsmandittaaq ilisimatitsissutigaa paasissutissat kommunip pigereertussaasai tassani pineqartut.

Ombudsmandip paasinninnera Naalackersuisut isumaqatigaat inatsisitigullu tunngavigisamik erseqqissaanissaq kissaatigalugu, tamanna Ombudsmandip kaammattuutaanut naapertuuttun-ngorlugu. Allannguut kommunit ineqarnermut tapiissutinik ukiumoortumik iluarsissuteqarnerini nutaamik qinnuteqartoqartarunnaarneranik kinguneqassaaq. Taamaattorli ineqarnermut tapiissutisartut paasissutissanik nutaanik ineqarnermut tapiissutinut pingaaruteqarsinnaasunik suli paasissutissiisussaataapput. Kommunini misilittakkat takutippaat, paasissutissat kommunimi pigineqartut allannguteqarsimannginnerisa qulakkeerneqartarnissaat pisariaqartoq.

Najugaqatigiiffiit ukiumoortumik naatsorsuutinik tamarmik ataatsikkut tunniussisannissaat tulluurtuunngitsoq A/S Inissiaatileqatigiiffik INI-p Ilaqutariinnermut Pisortaqarfimmut oqaatigisimavaa, tamanna inissiaatileqatigiiffiinnaannngitsumut aammali Namminersornerullutik Oqartussat Kommunillu kukkunersuisuinut annertuumik ulaperulutsitsisarmat. Taamaalilluni ullormi ataatsimi missingersuutinik naatsorsuutinillu tunniussisartussat najugaqatigiiffiit 100-nit amerlanerupput, soorluttaaq tamarmik avataanit kukkunersuisumit uppersarsaatnik pissarsisartussaasut. Allannguut najugaqatigiiffinnut allaffissornikkut oqilisaataassaaq.

Allannguutip siunnersuutigineqartup kingunerisaanik najugaqatigiiffiit ukiumoortumik naatsorsuutiminnik qanoq ilisukkut tunniussinissartik namminneq aalajangersinnaalissavaat.

Najugaqatigiiffiit ukioq naatsorsuuteqarfia nalinginnaasumik tassaasarpoq qaammatisiutit malillugit qaammatit aqqaneq-marluk, takuuk Namminersornerullutik Oqartussat kommunillu inissiaataannik attartortitsisarneq pillugu nalunaarut. Tamannali saneqqunneqarsinnaavoq najugaqatigiiffiup ukiumoortumik naatsorsuuteqarfini allanngortippagu.

### **3. Aningaasaqarnikkut allaffissornikkullu pisortanut kingunerisassat.**

Siunnersuut allaffissornikkut kommuninut oqilisaataassaaq. Naalackersuisut naatsorsuutigaat ineqarnermut tapiissutinut aningaasartuutit maannakkutut annertussuseqaannassasut.

### **4. Innuttaasunut allaffissornikkut kingunerisassat.**

Siunnersuut innuttaasunut malunnaatilimmik oqilisaataassaaq, imminut tunngasunik allanngortoqarsimatinnagu ukiut tamaasa nutaamik qinnuteqartariaarutissammata.

### **5. Oqartussaasoqarfiit peqatigiiffiillu tusarniaavigineqarneri.**

Siunnersuut oqartussaasoqarfinnut peqatigiiffinnullu makkununga tusarniaassutiginneqarpoq:

KANUKOKA, SIK, Kalaallit Nunaanni Sulisitsisut Peqatigiiffiat, A/S Inissiatileqatigiiffik INI, Ombudsmandeqarfik, ISI, Ineqarnermut Attaveqarnermullu Pisortaqarfik, Inuussutissarsiornermut, Nunalerinnermut Suliffeqarnermullu Pisortaqarfik, Akileraartarnermut Pisortaqarfik kiisalu Aningaasaqarnermut Pisortaqarfik.

Tusarniaanermi qulaani pineqartut akissuteqarnerisa kingunerisaanik § 9, imm. 1, uniffiit aappaat Naalakkersuisut allanngortippaat, imatullu allassimalerpoq inissiani attartortittakkani najugaqatigiiffimmut ilaasuni ineqarnermut tapiissutip ukiuata najugaqatigiiffiup ukioq naatsorsuuteqarfia malissagaa. Inissiaq attartortittagaq najugaqatigiiffimmut attuumassuteqan-ngippat, ineqarnermut tapiissutit ukiuata qaammatisiutit ukiuat malissavaa.

Aammattaaq Naalakkersuisut siunnersuummi § 9, imm. 2 allanngortippaat taamaalilluni ineqarnermut tapiissutisisartut ineqarnermut tapiissutinik annertussusiliinnermut pissutsinik pingaaruteqartunik inuttut imaluunniit aningaasaqarnikkut allannguuteqartoqarsimatillugu kommunitum nalunaaruteqarnissamik pisussaaffeqalerlutik.

Tusarniaanermik akissuteqaatit allanngortippaat siunnersuummut allannguuteqartitsisariaqarnermik nassataqanngillat.

### **Aalajangersakkanut ataasiakkaanut nassuiaatit.**

#### *§ 1-imut*

##### *Nr. 1-imut*

Iluarsiissutit kingunerisaannik ineqarnermut tapiissutisisartut ineqarnermut akiliutit allannguutaannut ineqarnermut tapiissutit malinnaanissaannik qulakkeerutissavaat. Malittarisassat nutaat malillugit ineqarnermut akiliutit allanngorneranni ineqarnermut tapiissutit iluarsiivineqartassapput, ukiup ineqarnermut tapiissuteqarfiusup naaneraniinnaanngitsoq.

Tamatununga peqatigitillugu najugaqatigiiffiit ataasiakkaat piffissap ukiumoortumik naatsorsuutit tunniussiviusussap allanngornissaanut periarfissinneqarput. Maannakkut najugaqatigiiffiit tamarmik ukiup nikinnerani ukiumoortumik naatsorsuutinik tunniussinissaminnut pisussaaffeqarput.

Inatsisartut Ombudsmandiata uparuaanerani akuersaarumallutik Naalakkersuisut malittarisassat allanngortinneqarnissaat kissaatigisimavaat, taamaalilluni

Ombudsmandip kaammattuutaanut naapertuuttunngorlugit. Siunnersuummi nalinginnaasumik nassuiaatit innersuussutigineqarput.

Allannguutip kingunerisaanik kommunit ineqarnermut tapiissutinik ukiumoortumik iluarsiiisuteqarneranni nutaamik qinnuteqartoqartarunnaassaaq. Taamaattorli ineqarnermut tapiissutisisartut ineqarnermut tapiissutit annertussusilernissaannut pingaaruteqarsinnaasunik ineqarnermut akiliutip, inuttut aamma aningaasaqarnikkut allannguutit pillugit kommunimut nalunaaruteqarnissaminnik pisussaaffeqarput. Assersuutigalugu tassaasinnaapput paasissutissat inoqutigiit annertussusaannik, katitigaanerannik aamma isertitaannut tunngassuteqartut

Qulaani paasissutissat pineqartut tunniunneqannginnerisa kingunerisinnaavat, kommunip missingersuilluni paasissutissanik pisariaqartunik aalajangersaasariaqarnera. Paasissutissanik pisariaqartunik tunniussinnginneq pissutigalugu ineqarnermut tapiissutinik annertuvallaanik tunniussisoqarsimatillugu kommunimit inissianni attartortikkani ineqarnermut tapiissutit pillugit Inatsisartut peqqussutaanni § 12 malillugu utertillugit akiliinissamik kommuni aalajagiisinnaavoq.

Attartortup pisussaafigaa najugaqatigiiffiup ukiumoortumik naatsorsuuteqarfia malinnaafigissallugu. Namminnersorerullutik Oqartussat kommunillu inissiaataannik attartortitsisarneq pillugu nalunaarut malillugu attartortoq ukiumoortumik naatsorsuutinik nassinneqartussaataavoq.

#### *§ 2-mut*

Allannguutit 1. januar 2005-imi atuutilernissaat siunnersuutigineqarpoq.